

瓊山縣人物志目錄

鄉賢

宋

姜唐佐

陳孚

陳應元

元

蔡微

張賢

明

唐誼方

張善教

唐衡

王惠

唐舟

唐亮

王克義

吳錡

薛遠

沈濬

邱敦

邱京

瓊山縣志卷十九

人物目錄

松宗哲

唐絹

馮禹

唐胄

陳實

鍾芳

曾鵬

蔡仕儲

蔡伯祥

林士元

陳大章

楊愷

陳常

陳應辰

吳效

吳會期

汪有執

吳誠

余宗梁

黃顯

黃宏宇

黃宏惠

廖士衡

陳天然

鄭廷鵠

許益光

李應和

海瑞

蔣蒙

陳思誠

楊應辰

劉裁正

王汝爲



王時元

陳大有

梁雲龍

陳傅嘉

陳大烈

王天麟

牛大緯

許子偉

陳應龍

何其義

潘之楫

黃壽之

陳邦禎

謝應華

張希堯

邱爾懿

蔡廷椿

吳鉉鍾

梁思泰

張紹美

國朝

張履吉

馮侯

林儲英

蕭元長

吳金

吳典

瓊山縣志卷之十九

人物志一 宋 元 明 國朝

鄉賢

宋

姜唐佐字君弼

黃通志作公弼

瓊山人己卯閏九月從學

於東坡至儋耳庚辰三月方還瓊

阮通志

東坡甚

重其才嘗跋其課冊云雲興天際歛若車蓋凝

眸未瞬瀾漫靈巒驚雷出火喬木靡碎殷地藝

空萬夫皆廢懸溜綆墜日中見沫移晷而收野

無完塊蓋極狀其文氣雄偉磊落倏忽變化也

黃通志

後遊廣州學有大名登

郭薦

蕭志

灤城集云

瓊山縣志

卷十九

人物名賢

吾兄子瞻謫居儋耳瓊州進士姜唐佐往從之

遊氣和而言道有中州士人之風子瞻愛之贈

之詩曰滄海何曾斷地脉白袍端合破天荒告

之日子異日登科當為子成此篇崇寧二年正

月隨計過汝陽以此句相示時子瞻之喪再逾

歲矣覽之流涕念君要能自立而莫與終此詩

者乃為足之云生長茅間有異芳風流稷下古

諸姜適從瓊管魚龍窟秀出羊城翰墨場滄海

何曾斷地脉白袍端合破天荒錦衣今日千人

看始信東坡眼力長

阮通志

祀鄉賢

陳孚嘗從郡守建陽宋公貫學得第鄉人慕之始

習進士業後多甲科自平始也

阮通志 祀鄉賢

陳應元字景仁七歲能屬文年十八授徒鄉校舉

瓊臺掌閣登紹定二年己丑進士初尉徐聞秩

滿僉書昌化軍漕使顏殘辟宜倫令尋改番禺

李昂英

昂原志作昂

徐清叟董槐

董原志作董

李曾伯交

章薦之倅雷攝儋所至有聲學行政事為瓊士

先祀鄉賢子明震以應補將士郎明俊以昌化

築城功亦授官

黃通志

元

蔡微字希元

元原志作微

號止菴宋學士襄之裔居萬

寧後遷瓊山通經史善文辭知縣李思迪稱其

瓊山縣志

卷十九

人物名賢

二

文謂海南儒者未能或之先任樂會學後攝

瓊郡學值時不偶遂隱不仕纂瓊海方輿志

戴通志

志 祀鄉賢

張賢五原人至正中陳子瑚陷郡城瑚死弟有慶

接踵煽逆偽萬戶裴元貴黨與潘應吳紹先等

據瓊城民被荼毒賢倡義兵丙午三月斬元貴

等暨餘黨不計數追取各衙門印信復郡城本

道副都元帥陳乾富等達其事齎馬匹表裏銀

碗賞勞授安撫司僉事丁未復立屯田萬戶府

以賢機謀宏遠韜畧深沉陞授萬戶領之洪武

元年歸附二年以賢良例起之行至廣州告老

歸卒阮通志祀鄉賢

明

唐誼方本名遜以字行東廂人元郡教授聞孫篤學好古元末隱居避辟洪武初首舉經明行修授郡庠訓導有規範永樂三年乙酉冬詣闕請老太宗奇其狀貌容止曰此老回去還有十年壽門有古榕常休憩其下雨則躬循田畝他勝有敗者亦為治之代貧乏嫁娶鄉里稱榕樹公真長者姪舟少從筆硯後歷官內外臺奉書問安誼方答以詩有云勿憂吾有病且喜汝無錢永樂乙未卒壽七十七果符十年之語瓊海方輿志

人物名賢 三

瓊山縣志 卷十九

祀鄉賢

張善教五原人萬戶賢子洪武丙子由貢中應天鄉試授岑溪教諭永樂初改沙縣教諭學行粹潔立師道明職業未逾年士多感化倡義捐資以新文廟黃通志歸建濱淪亭與趙謙王惠楊升游咏為一時推重賈志其在沙縣時所嘗行止處人以瓊臺瓊谷目之福建通志祀鄉賢

唐衡字平叔通經博學善古文洪武初以經明行修起為府學訓導後陞福建都司斷事阮通志

王惠字仲迪家本合肥從兄千戶志調官海南遂占籍焉博洽能文嘗從趙考古講明性命義理

之學潔白清修毅然自立學士解縉稱之洪武
末大臣薦至京以三喪未舉力辭歸號霜筠天
下高其節行所著有截山詠史嶺南聲詩鼓吹
等集祀鄉賢牛志兄懋別見隱逸傳

唐舟字汝濟東廂人父英別見卓行傳舟學優才
贍建文壬午鄉試永樂癸未復試皆第二甲申
舉進士授新建知縣始至簡易御下無赫赫名
久而漸著上下大服有問其故曰古人所謂新
任如處暗室輕動必有觸損久坐自明未幾應
求賢詔陞江西僉憲整肅紀度郡邑承望風采
南昌守以舊隙恐懼不敢仰視舟加敬禮人服

瓊山縣志

卷十九

人物名賢

四

其量後以事降判衢郡折節撫綏尋以非辜從
戎隆慶衛衢人思之仁宗登極大臣首薦爲監
察御史入京即抗辯內侍陷黃本固等數事風
節愈勁出按浙江所至多政譽爲人胸次坦夷
光明無纖芥吟域率性任真敷歷中外餘三十
年所至有冰蘂聲嘗題門帖曰雪霜半染中年
鬢天地應知暮夜心及歸杜門不出家無儋石
之儲晏如也年八十二無疾而終戴通志祀鄉賢

唐亮字景明舟子幼聰敏隨父宦遊常山學中永
樂丁酉浙江鄉試戊戌登進士除泗州判官晉
詹事府主簿仁宗朝擢寧國府同知黃通志

王克義字宜齋海口人永樂乙酉鄉薦丙戌進上
授崇仁知縣大臣以博學宏詞薦至則增減宋
詞科試之稱旨授工部主事尋出為建昌推官
所至有廉能聲其試蓬萊春曉歌為時傳誦戴通
志祀鄉賢

吳錡字坦齋西廂人世居南橋永樂戊子舉人辛
丑進士授義寧知縣重建縣治修公廨尤加意
學校士皆知向學粵西文載明初瓊俗敦樸禮文苟
簡坦齋始以詩書倡導鄉邑凡冠昏喪祭多所
取則比兩京縉紳欲行冠事筮寶輔於國學兩
出吳氏門人吳畊沙洪當時莫不景仰瓊為海

瓊山縣志 卷十九

人物名賢 五

外鄉魯然後知坦齋天下士也王佐文集

薛遠字繼遠前所人世本無為州人祖祥洪武間

為工部尚書獲罪父能坐戍海南衛遂籍焉蕭志

遠正統壬戌進士景泰時官戶部郎中天順元

年擢本部右侍郎改工部奉詔塞關封決河還

仍改戶部成化初督兩廣軍餉位至南京兵部

尚書以忤汪直免官明史薛祥傳宏治壬子以建儲

恩進階榮祿大夫乙卯年八十二卒贈官保蕭志

遠敏而好學於禮樂兵刑天官律歷無不涉其

要尤熟本朝典故在戶部最久均節委積內外

遠近多寡輕重皆有法式會計出納胥吏斂手

每年中外競陳利害迭為報罷有司不知所從
遠以為凡若此者一切報罷則官省民安時論
韙之嘗曰馭吏嚴刑以懲不若先事而發善革
弊不若無弊可革其慮事中理多類此有司為

建祖孫尚書坊戴通志祀鄉賢

邱濬字仲深西廂人其先世家泉州晉江元季有
官於瓊者遭亂不能歸遂籍焉何喬新撰誌銘祖普性
仁愛專事濟人為臨高醫學訓科宣德甲寅郡
大饑白骨遍野以第一水橋地置義塚躬求全
飢瘞之封塋纍纍百餘所清明節必洒以酒飯
所行自少至老多類此年享遐壽人謂天報父

瓊山縣志 卷十九

人物名賢 六

傅登卒母李氏守志訓之濬生有異質讀書過
目成誦日記數千言六歲信口為詩語皆警拔
嘗咏五指山識者知為國器稍長博觀羣書雖
釋老伎術不廢黃通志家貧無書嘗走數百里借

必得乃已明史本傳年十七始習舉子業落筆為文
數千言立就冀出倫輩牛志正統甲子首舉於鄉

主司全錄五策兩試禮部名在乙榜卒業太學
祭酒蕭磁深器之由是名益重景泰辛未告歸
所與厚者咸贈以詩編修岳正知其後必大成
作序送之甲戌復試禮部學士商輅主試事閱
論策意為濬及揭名果然廷試二甲第一選入

翰林爲庶吉士者十八人濬爲首被命修寰宇通志時洗馬李紹偕諸學士會史館謂濬曰子生海外何從得書籍師友而博洽如此濬自以遠方新進一旦名動京師欲然不自足益求人間未見書讀之遂以博洽稱於時尤熟本朝典故樂爲學者道之通志成授翰林院編修文章雄渾壯麗四方求者登至碑銘序記詞賦流布遠邇然非其人雖厚幣請之不與黃通志海南衛官軍苦遠調天順七年濬奏免專防海黎上嘉納之至今瓊南軍衛尸祝焉賈志兩廣用兵經年不息濬條列事宜奏記大學士李賢纒纒數千

瓊山縣志

卷十九

人物名賢

七

言賢善其策上之英宗嘉嘆付所司舉行總兵官趙輔巡撫御史韓雍破賊多用其策八年憲宗登極充經筵講官成化元年陞侍講命與修英廟實錄三年實錄成進侍講學士經筵進講吐音洪暢憲宗竦聽甚悅五年丁母憂服闋復職十三年續修宋元綱目成陞翰林學士濬自出已見撰史畧謂朱子綱目以正統爲宗然秦隋之未有不可遽奪漢唐之初有不可遽予者乃作世史正綱以著世變之升降明正統之偏全有裨世教是年祭酒員缺僉謂非濬不可乃陞祭酒黃通志時經生文尙險怪或不可句濬主

南京鄉試及禮部會試深痛斥之怨誹不恤也
及爲祭酒尤諄諄爲學者言文體乃復渾厚士
有慕道學者或過爲詭異以邀名因考會試發
策言之所言皆切時弊何喬新撰墓銘士乃知道以中
庸爲至詭異不足尙也其在太學論者謂師道
尊嚴無愧李文忠公綜理細微則文忠公不及
嘗謂朱氏家禮最得崇本敦實之意然儀節畧
焉乃考諸儒言作家禮儀節使好禮者依之行
朱子微言散見傳註語錄學者卒未易求乃采
其精切者彙爲二十篇作朱子學的何喬新撰墓銘
六年加禮部侍郎仍掌國子監事復以西山真

瓊山縣志

卷十九

人物名賢

八

氏大學衍義有資治道而於家國平天下之事

缺焉乃采經傳子史切於治國平天下者附以

己見凡一百六十卷賈志彙輯十年以補真氏之

闕其目凡十有二曰正朝廷其目六曰正百官

其目十有一曰固邦本其目十有一曰制國用

其目十有一曰明禮樂其目六曰秩祭祀其目

七曰敦教化其目十有一曰備規制其目十有

六曰慎刑憲其目十有四曰嚴武備其目十有

六曰馭邊方其目九曰成功化其目一瓊臺而會藁

其大要則尤在審察其幾微之先以成天下之
務故又首補誠意正心之要曰審幾微自爲一

卷其目有四曰謹理欲之初分察事幾之萌動
防姦萌之漸長炳治亂之幾先著論發明慎獨
內省真切有先儒所未及者蓋其獨得之見也
名之曰大學衍義補孝宗嗣位乃表上之上覽
之甚嘉批答有曰卿所纂書考據精詳論述該
博有裨政治朕甚嘉之黃通志資金幣命所司刊
行特進禮部尙書掌詹事府事明史濬累疏力辭
求致仕不允會修憲廟實錄充副總裁官宏治
四年實錄成加太子太保復三疏求致仕不允
黃通志尋命兼文淵閣大學士參預機務時年七
十一矣明史入內閣復三疏固辭不允乃奏請擇

瓊山縣志

卷十九

人物一名賢

九

衍義補中要務行之上見納乃就職務以寬大
啟上心忠厚變士習凡人才進退政事廢舉一

惟祖宗舊典是循

黃通志

五年上疏數千言請釐

革弊政二十二事

疏見藝文

又請訪求遺書上皆嘉

納洪武永樂以來凡百司朝覲命吏部都察院
考其尤不職者乃黜之不過數十人成化六年
大計羣吏吏部務以多黜爲公方岳以下少有
微瑕輒黜之黜者亦不敢訴濬深知其弊言於
上曰唐虞三載考績三載黜陟今有居官未半
載而黜者人言未必皆實此非唐虞之法亦非
祖宗舊制也上深然之會吏部上大小庶官當

黜者幾二千人乃勅凡歷官未及三載者俱復其任非有貪暴實跡勿黜蓋用其言也醫官有療疾往來濬家者以失職怨冢宰王恕奏許其短或疑出濬意上察其誣待濬益厚七年加少保兼太子太保改戶部尚書武英殿大學士以目疾辭不允濬性剛直與大臣論政議所未安必反復辯論言官論事亦必以是非詰之不肯媵媵取悅前後凡十三疏乞歸上皆不允問勞賜資踵接自筮仕至位極人臣四十餘年自處無異草布產業僅能卒歲第宅不逾齊民在都城市屋於蘇州巷南規模卑陋僅蔽風雨始終

瓊山縣志

卷十九

人物一名賢

十

未嘗少拓到今呼爲邱閣老巷所得俸祿卽充官費絕無贏餘八年卒於官年七十六訃聞天子嗟悼輟朝一日賻寶鈔一萬貫贈特進柱國太傅諡文莊命行人宋愷護喪南歸行裝自欽賜白金綺幣外惟圖書數萬卷而已

黃通志

正德

十年巡按御史奏濬起自甲科歷事列聖倦倦以忠君愛國經世宰物爲心修職之暇著書垂訓使學者明綱常以端本原酌古準今以成天下之務於世教非小補也

景賢祠疏

因賜額祀於鄉

曰景賢以配宋學士蘇軾以風示天下凡近臣文臣生死承恩眷之隆實前此所未有者

黃通志

濬弱冠著書謂許衡仕元無能改於其俗必不能行己之道雖不仕可也聞者駭愕牛志至修英宗實錄有言于謙之死當以不執書者濬曰已已之變微于公社稷危矣事久論定誣不可不白其持正多類此明史本傳先生之學以紫陽爲宗讀書窮理以究極聖賢之蘊其志以身致太平爲己任著書必事事求其可行立朝不干名譽介然以清節自勵家庭孝友鄉黨服其化會稿後序嶺南人物自張文獻公有聲於唐余襄公崔清獻公有聲於宋迨公四人焉公晚登政府疾病半之然大學衍義補一書其經濟之才可見矣

瓊山縣志

卷十九

人物名賢

十一

朱子學的一書其爲理學亦可知矣經濟理學兼而有之使得久於位盡行其言相業豈三君子可及哉何喬新撰墓誌尹直贊曲江其師東坡其匹世以爲知言云賈志祀鄉賢

邱敦字一成濬長子性簡默塾師疑其癡濬遭喪留敦在家敦乃盡讀所儲書非有事足跡不涉公府對人如木偶不出一語會高雷間有故河遺跡有司開通以便往瓊舟楫敦家書併及謂疏治失宜恐先貽害元人治河因之召亂往事可鑒濬得書始知其不凡也屢書趣還京邸以廕錄爲太學生挾春秋藝試京闈下第遂屏棄

舉業研究經史百家絕無進取之意其學以積思自悟爲主終日凝然無言繼以通夕不寐有所得發而爲文多不起草落紙如飛酷嗜素問著醫史其運氣表三因說言皆有補於世時見倖佞李廣輩將復成化故事作發冢論以攻宦者蓋取莊子詩禮發冢之義設爲甲乙辨詰之辭黃通志謂其友蔣冕曰走爲此論乃癡人說夢事也安知聞人說夢者亦不癡其人哉夫天下之事心有所蔽則以惡爲美以非爲是以害爲利者多矣自非爲之說者逆探其所料指摘其所信推極其所期竭兩端而盡之又曷足以感

瓊山縣志

卷十九

人物名賢

十一

悟其心也耶已而思母嬰疾宏治三年卒於京邸年三十一敦雅好儉素雖生長富貴自奉率如寒士少時不肯衣新衣或問其故曰吾特惡其華爾海外俗尙侈巨室子弟多乘馬張蓋敦獨徒行不由中路遇者望而知爲敦也見利顧義辭受無大小必謹有瓊守遣訟者饋五百金使爲解紛敦斥去之方伯陳選因其北行贐白金二錠遣人致辭曰選生平不餽遣人徒以老門生之故耶君其勿却敦竟不受每欲修會祖掩骼故事施德於不報北來時夜宿會通河夢至岸傍有古墓啣於水明日過之儼然夢中所

見亟戒從者掩以土而後行其嚴毅中有惻隱
如此卒時蔣冕哭之慟爲序其書以行於世

黃通

志祀鄉賢

邱京濬季子字峻成以廕授中書舍人性習仁愛
重義樂施瓊州經二大征後白骨徧野盡收而
瘞之時疫大行施良劑以救活者甚眾有曾祖
風平居罕至城邑有司重之敦子當廕尙寶司
丞卒復以當子郊字汝賢繼其官郊事祖母及
母以孝聞與其弟祁友愛尤篤祖業有膏沃者
讓諸祁祁不肯受則曰我有官矣宗黨皆多其

義黃通志

瓊山縣志卷十九

人物名賢

十三

林傑宅念人景泰庚午舉鄉試亞元甲戌成進士

授南臺御史陞浙江副使

牛志

表賢亭以表薛遠

邢宥邱濬林傑四賢提學胡榮有記其畧曰四

賢俱發軔巍科接踵要路猷爲足以匡弼時政

風裁足以激揚濁清文章足以補助道化實瓊

人之師海內之望也

阮通志

年八十一卒

牛志

林宗哲字執中大林人順孫天順壬午舉於鄉知

巢縣授蕭湖河泊官邵暮金五百兩巢河泛溢

病涉捐俸造浮梁旱蝗禱城隍蝗不入境虎啞

人文告山靈虎斃淮安士民訴父冤輒曰願得

巢令訛無憾也

郝通志

祀鄉賢子汝常亦舉鄉試

知仙遊縣

賈志

唐絹東廂人瑤之姪寓居澄邁天順壬午鄉薦成化己丑進士爲江陰令廉而恕時特越法有所縱舍御史怒其專擅劾爲故出罪當謫戍絹無以自明奮怒引刀自刎而不殊時武進令熊翀絹同年進士也聞之亟令善治金劊者往治之得不死翀復令人代絹詣闕訟冤章下南京都察院辯之事白絹得復官

阮通志

馮禹字有孚蘇尋人宏治己酉鄉薦九年進士初爲戶部主事官軍討叛黎符南蛇久不克禹歷陳致變之由請購已革士官子孫俾招集舊卒

瓊山縣志

卷十九

人物名賢 十四

以夷攻夷有功則復舊職尙書劉大夏亟稱之奏行其策

阮通志

歷官本部郎中巡歷古北口九

江抽分以能謹著改湖廣監察御史

牛志正德初

偕中官高金勘涇王所乞莊地清還二千七百

餘頃

明史劉天錫傳

嘗以事忤劉瑾爲所誣陷憤激卒

於官

賈志

人皆惜之瑾誅復官賜祭

明史祀鄉賢

唐胄字平侯東廂人幼穎敏博通經史百家宏治

戊午鄉試壬戌會試皆魁禮經

賈志

授戶部主事

以憂歸劉瑾斥諸服除久不赴官者坐奪職瑾誅召用以母老不出嘉靖初起故官疏諫差內臣蘇杭織造請爲宋死節臣趙與珞追諡立祠

進員外郎遷廣西提學僉事爲購羣書以迪多
士令土官及徭蠻悉遣子入學擢雲南金騰副
使土酋莽信虐計擒之木邦孟養構兵冑遣使
宣諭木邦遂獻地屢遷廣西左布政使官軍討
古田賊久無功冑遣使撫之其魁曰是前唐使
君令吾子入學者卽解甲明史本傳時王府宗室受
封賄官吏補支祿米自出幼具題曰爲始歲費
幾千萬石乃奏革其弊得旨如議通行天下獻

錄

擢右副都御史巡撫南贛移山東遷南京戶

部右侍郎十五年改北部進左侍郎帝以安南

久不貢將致討郭勛復贊之詔遣錦衣官問狀

瓊山縣志

卷十九

人物 名賢 十五

中外嚴兵待發冑上疏諫不可者七

疏見藝文章下

兵部請從其議明年四月帝決計征討侍郎潘

珍兩廣總督潘旦巡按御史余光相繼諫皆不

納後遣毛伯溫往卒撫降之郭勛爲祖英請配

享冑疏爭帝欲祀獻皇帝明堂配上帝

明史本傳冑

抗疏爭辯不屈

疏見藝文

帝大怒下詔獄拷掠削籍

歸遇赦復冠帶

明史及疾篤聞帝奉章聖太后梓

宮南耐喜曰此神聖之見也猶力疾北向叩首

蕭

尋卒隆慶初贈右都御史冑耿介孝友好學

多著述立朝有執持爲嶺南人士之魁

明史本傳爲

文有理致源委不尙浮靡篤嗜白玉蟾詩文爲

之精選名海瓊摘稿所著有瓊臺志江閩湖嶺
都臺志西湖存稿行於世阮通志祀鄉賢子穆嘉

靖戊戌進士禮部員外郎為人雅樸有父風著

有餘學錄孫恪以應授官蕭志

陳寶字秀卿頓林人曾祖士聰祖蔭父昭世有隱

德寶童時重厚弱不好弄十七遊邑庠宏治戊

午鄉薦壬戌進士劉瑾用事即告疾歸家居足

跡不入城市遭父喪服闋未起瑾矯詔例勒除

名瑾敗起為南京江西道御史時內臣趙蘭以

內旨採珠於合浦騷民贖貨劾罷之尋以母喪

去服闋除廣西道辛巳出按應天徽寧諸郡舉

瓊山縣志卷十九

人物一名賢 十六

劾無所遺蕪湖有沙灘民業葦利中貴奪之實

奏還於民嘉靖初出知常州府嚴參見之儀謹

文移之式為遠大而不屑近小期月上孚下悅

稱循良歲大祲民率走死憂甚檢庫中羨餘得

銀數千兩糴穀賑之或勸分富室不聽曰人各

為家勸猶歛也是冬有年浙東海道倭人入貢

與人交貨羣鬪殺人都指揮以下驅焉而被害

者一人傷者若干人事聞朝議守者不豫欲置

重法上遣都給事中劉會巡按御史王臨覈之

檄與其事實言倭來以貢不以寇事出不虞安

能豫之雖然官亦不能無罪若加重法則過矣

至士卒於主將死不赴救自有常法亦不可加重上如議從之既歸常病士習之浮靡欲以正學倡之謂宋楊龜山嘗與鄒道鄉諸君子講明程學於常留寓最久乃建書院於城之西隅以祀龜山道鄉而下十人榜曰道南取程子送龜山語也平居無浮言妄動事必有則精密平恕每以古人自期居家孝友內外無間言從弟容死遺孤二人育之成立有田數百畝歲入取給賓祭日用餘悉分諸宗族土官某犯法以數千金乞言緩死峻拒之

阮通志

嘗曰學重養心尤莫先於辨義利人多銘座右撫按交薦卒於官御

瓊山縣志

卷十九

人物名賢

十七

史朱實昌爲之奏請卹典蓋異數也所著有虛菴集祀鄉賢

蕭志

鍾芳字仲實先崖州人改籍瓊山少育外親因黃姓後奏復焉自幼穎異十歲入州學宏治辛酉領鄉薦第二正德戊辰登進士二甲第二選翰林庶吉士授編修以忤時左遷寧國府推官精於吏事能折滯獄他郡咸求質成政績大著會大水歲祲議行賑恤民獲奠居部使者交薦其賢陞漳州同知尋擢知府事時兵憲欲征漳寇芳主相機撫剿督府卒從其議陞南京戶部員外郎署吏部稽勲司郎中轉考功一時名公如

劉春羅欽順凡甄別優劣皆從其言遂實授陞
浙江提學副使校文必尙名檢敦行力學者爲
上穎悟淹貫言行知慎者次之挑達諧蕩者文
雖工必懲由是浙士斐然向風陞廣西右參政
單車入洛容諭降賊帥羅朝墮等千餘人尋調
兵扼險攻柳州馬平之穿山峽賊皆喙息貴縣
多虎患爲告山神虎悉遠遁會督府召議軍事
芳留蒼梧而鵬剿六青諸崗招降賀縣恩柳等
寨皆其策也黃佐撰墓誌銘討田州叛酋岑猛定平樂
大藤峽屢有軍功捷聞兩賜金帛陞江西右布
政使凡藩祿軍需之難處者區畫悉得大體獻徵

瓊山縣志

卷十九

人物名賢

十八

錄庚寅陞南京太常寺卿明年春大臣行祭告
禮欲比正祭芳言告祭主於誠不在備物禮當
與正祭異惟用脯醢酒果上從之著爲令尋攝
國學講論經義求諸身心胄子莫不感動陞南
京兵部右侍郎與參贊王廷相協恭革弊諸凡
稅蠹爲之頓清改戶部右侍郎與許讚經畧邊
儲以紓民力復查舊規嚴限以警濡滯散餘米
給軍以免鬻船之患於是漕政大舉甲午七月
南京太廟災自陳修省以回天變言甚剴切且
乞休益力上重違其請准致仕家居十餘年未
嘗一至城市惟以書史自娛有干以私者謝曰

吾守志猶嫠婦豈以晚而失節耶事繼母楊至
孝兄魁弟英早夭禮恤嫠嫠俛守貞得所人以
爲難其爲文雄渾精深氣隨理昌論學以程朱
爲宗嘗言性根諸心非學弗培故道問學卽所
以尊德性非有二也又謂存養兼動靜非端默
靜坐之謂知行本自合一知以利行行以踐知
理無內外心亦無內外也晚年卜築於瓊名其
居曰對齋義取對越上帝事道卽事天也蓋其
用功益密所造益深矣墓誌甲辰卒於家年六十
九訃聞贈右都御史賜葬祭芳性簡重寡嗜慾
其爲學博極而精雖律歷醫卜之書靡不通貫

瓊山縣志

卷十九

人物名賢

十九

然皆取衷於孔孟正論爲嶺南鉅儒所著有學

易疑義二卷

朱彝尊經義考作三卷

春秋集要十二卷

欽定四庫全書提要此書以集要爲名故文殊簡畧中

間如謂春王正月爲建子謂桓公三年書有年

非紀異謂襄公二十八年書衛侯衎非俟其改

過謂昭公元年書敗狄於鹹非譏毀軍崇卒皆

發前人所未發復有皇極經世圖續古今紀要

崖志畧小學廣義養生舉要及詩文二十卷行

世

獻徵錄

子允謙字汝益爲人純實廉靜無求讓

父廕於從子鄉人高其義登嘉靖己丑進士知

浙江寧海縣稽飛稅均丁糧復塘壩以滋灌溉

牛志以經學飾吏治泄事嚴而有法庭無私謁建社學置社田留心教化陞刑部主事

浙江通志歷陞

知福州府有惠政丁艱起復補知萊州卒於官與父同祀鄉賢允謙子儲温和純厚事繼母得其歡心尤善處兄弟不失世訓

賈志

曾鵬字元翰宅念人父英正統甲子鄉薦宰茂名

清苦愛民鵬宏治辛酉鄉薦正德甲戌進士知

龍溪兵荒相仍乃緩征薄斂捐俸修學築八都

諸堤有惠政民立石頌焉

牛志

祀名宦擢刑部主

事歷福建副使辨冤獄如神改貴州都勻兵備

旬月平土寇蒙鉞招降海口賊阿向晉參政未

瓊山縣志 卷十九

人物 名賢

二十

行分守某欲自以為功乃率眾襲賊全軍覆沒

撫臣急檄鵬終其事至則單車入賊壘賊駭曰

聞公已遷去今猶在耶鵬為言禍福遂解兵聽

約束

郭通志

未幾以足病乞休疏三上不許乙未

八觀時武定侯郭勛當國外官多餽遺者鵬曰

吾生平不能委曲今老矣奈何白首改節遂歸

郝通志

海忠介稱鵬為先輩師法祀鄉賢

賈志

蔡仕儲字鍾秀號石南遵都人質粹行純博極羣

書年十八為人師年長以倍者皆北面執弟子

禮有河汾之風有司欲周其貧堅守皜如也高

雷之士越海從遊者甚眾正德庚午領鄉薦遊

太學發尙書人心道心之旨申明義利之辨祭酒湛若水深服之林參政士元贊其爲明道先覺潛德化鄉云學者稱石南先生

黃通志

祀鄉賢

蔡伯祥字景和遵都人恬靜簡默學問蘊藉正德

間由舉人任翁源訓導

黃通志

伯祥任翁源十六

年爲人口吃而善屬文提學魏校招至省城講

學韶州知府周叙延入郡城爲大邑弟子員講

授應聘廣西衛文甚稱得人以會試卒於途旅

櫬至韶諸弟子哭之哀知府唐昇給資歸祀名

宦

翁源縣志

祀鄉賢

林士元東洋人字舜卿正德庚午鄉薦甲戌進士

瓊山縣志

卷十九

人物名賢

二十一

授行人冊封唐藩饋金六十鎰卻不受王深器

之乙酉擢南京戶科給事中劾光祿少卿史俊

怙勢殺人都御史汪鉉考察不公併劾罷內外

不職者數十人仕路一清先後陳時務數十疏

皆極剴切壬辰擢湖廣副使備兵衛永江華流

民與土戶爭田構兵連年禍延諸郡士元單騎

往諭爭遂息吏部郎中鄧尙義之弟挾制守令

侵牟里黨按以法轉廣西參政分守蒼梧戊戌

征大藤峽士元督餉紀功有貴勢子弟希報功

次絕不假借捷奏擢浙江按察使未赴以憂歸

遂不起祀桂林名宦

郝通志

晚年家居時或戴笠

躬耕鄉人賢之所著有學思子中庸孟子衍義
讀經錄讀經附錄孔子世家顏子列傳討論北

泉論草及文集十卷祀鄉賢

阮通志

陳大章字紹遠中所人正德庚午鄉薦司訓漳州

遷安仁教諭擢竹溪縣令有政聲以終養家居

杜門誨子郡守張子宏雅重之

郝通志

曾纂修漳

州志卒年七十有五

舊志

祀鄉賢

楊愷西廂人正德癸酉舉人嘉靖癸未進士任南

京戶部主事告終養歸祀鄉賢

陳常字時敏興義人少孤貧讀書不爲記誦夜坐

沉思有所得卽燃燭書之觀中庸至廢寢食語

瓊山縣志

卷十九

人物名賢

三

人曰中庸無所不貫吾人終身受用不盡正德

癸酉領鄉薦任化州學正督學魏校歐陽鐸俱

重之屬校兩漢書以憂去補寧州擢知桂平三

年罰鍰不入已上官派貨於屬邑令鬻之常曰

夙聞瘠己肥民不聞虐民媚上竟謝職去士民

泣送之祀名宦常性嚴格處屋漏如對大廷不

少放恣鄭廷鵠稱其篤實務學不近勢利皆實

錄也

牛祀鄉賢志

陳應辰字思齊興義人常子性資端謹有父風長

於詩文執父喪三年廬墓不懈常市糴商有誤

加者計直所贏追而還之

郝通志

好施與戚屬貧

乏多所周濟不忍傷物雖微而鳥窠蜂房必戒
護之嘉靖辛酉貢於鄉授古田司訓以內憂起
補臨川多曲成士類轉代藩教授卽拂袖歸家
居十一年雖屢空晏如也每題柱曰書本看來
多少益菜根咬得有餘香卒年七十有五賈海志
忠介作詩輓之曰破屋淒淒問故人空遺正氣
兩間存西風吹透綿花絮復死何人付史論祀

鄉賢

吳效字復初張吳人性孝義少遊邑庠當食餼遭
內艱輒惻然不忍就其季子昌期死於車輶車
家以貲求免固卻之牛志曰汝何心誤傷耳里中

瓊山縣志

卷十九

人物名賢

三

多好訟廢學乃構精舍行朱呂鄉約演四禮以

勸說之祀鄉賢

郝通志

吳會期字可行張吳人效子篤行古道正德己卯
鄉薦時僉憲汪鏞以所罰黎民悅七十金爲餽
會期受而還之民悅登嘉靖癸未進士授南京
戶部主事轉工部郎中營九廟稱旨嗣修七陵
內侍高宗冀營私蠹會期不與旣告成省費十
五萬進正四品俸服牛志時嚴嵩當國欲會期附
己私語同官熊某曰此郎視京堂若固有足不
一至吾門何迂也會期聞之作迂愚解嚴嫉之
言者承嚴意旨論謫於外遂拂衣歸肅皇晏駕

衰服宿崇文院三日倚廬於中門外者二十七
日其忠愛如此立家廟置義田日與親族相規
勸海忠介稱貌古心實直指陳道基旌其門院通
志祀鄉賢

汪有執字義甫右所人事繼母以孝聞領正德己
卯鄉薦知海門陞通州守河間同知歷官戶部
員外郎悉稱職郝通志後去任家居十餘載絕跡
公門享年八十賈志祀鄉賢

吳誠字明卿大攝人性敏嗜學領正德己卯鄉薦
初授柳城教諭督學重之檄掌八桂書院修柳
城志遷贛州教授修都臺志擢知龍南釐夙弊

瓊山縣志

卷十九

人物名賢

二十四

釋士人馮堯寃獄流賊爲患誠躬撫諭賊魁謝
鉞李鑑皆感泣而去尋討平沙頭賊徐守沐一
方賴之致政家居絕跡城市嘗參酌藍田鄉約
率鄉人月朔舉行當道造廬禮焉誠少孤有姑
適舉人李明年二十四孀居撫誠比姑卒誠服
衰三年人兩義之郭通志每遇考妣忌辰哀痛竟
日娣年八十迎養於家歿葬從厚所著雁峯集
百餘卷牛志祀鄉賢

余宗梁

阮志作俞

字景山前所人正德己卯鄉薦嘉靖

丙戌進士博極羣書而性方直知新昌縣爲政
嚴毅而濟之以寬遇歲大祲設法施賑民賴全

活者數萬有搶掠為盜者勸諭歸農民怙恃如
父母又毀浮圖立社學旌孝節治行為一時最
擢南京刑部主事歷郎中讞議惟平有豪貴囑
重入者正色卻之常俸所入皆以奉母恤弟不
入私囊及卒妻孥不能自給侍郎鍾芳重之為
紀其行以傳焉

黃通志 祀鄉賢

黃顯字仁叔下東岸人嘉靖壬午鄉薦辛丑進士
授刑部主事治獄多所平反抵中貴呂洪贓罪
雪總兵沈希儀誣誤皆不為當軸屈出守撫州
罷築千金陂以蘇民困完逋數萬而刻核不及
於下郡民立祠祀焉以憂歸

郭通志 補池州池故

瓊山縣志

卷十九

人物 名賢

二十五

饒山澤利顯益謹身率下不少徇私狼兵自湖
趨浙所過殘暴顯以智服其帥而厚犒之迄不
為害

赫通志

尋擢湖廣副使時嚴嵩方用事遂乞
休卒祀鄉賢

黃宏字震祥下東岸人顯長子少受學於尚書
霍韜年十七舉嘉靖庚子順天鄉試登己未進
士授戶部主事督運昌密陳五難三便監兌南
都復以水災備陳損上益下用一緩二之義民
困獲甦

郭通志

出守武昌作政約諭僚屬一意廉
靜楚藩以事餽黃金百兩不受景王歸塋使人
以禮諭中官復下令曰護軍敢譁吾境者執之

既過卒無敢譁者凡興利革弊恤獄賑饑俱有聲入覲首舉卓異尋擢四川副使歷浙江參政以憂歸牛志祀鄉賢

黃宏憲字賁祥下東岸人顯次子嘉靖乙卯舉於

鄉令南康著古制以自檢約建六議以正民風

懸鉞告奸設匭稽弊郭通志有葉楷者贛湖巨寇

宏憲條可捕治狀撫院江一麟允行之檄鄉民

勦其巢穴江為具奏加五品俸服調知安遠以

憂未任牛志起補懷集捕魚峒鹿馬諸寇有功撫

按交薦未幾卒郭通志祀鄉賢

廖士衡字平卿性剛方動遵矩矱領嘉靖乙酉鄉

瓊山縣志 卷十九

人物 名賢

二十六

薦知德化判南寧所至有政聲致仕家居雅存

古道年八十卒祀德化名宦郝通志祀鄉賢

陳天然字汝仲東廂人孝友溫惠有雅量登嘉靖

戊子鄉薦乙未進士授戶部主事兩督倉儲監

鈔九江俱以廉節著歷陞鎮江府知府適遇荒

旱而洲灘虛稅為民累天然至輒為釐減江寇

猖獗厲兵備禦郡賴以安故事需用科派里甲

天然盡革之為置公田租入取辦捐俸立學田

賑貧士李儔冉信等例監曹大章闡文限於格

天然器之力為薦拔連魁南官廣大僉憲劉紘

齋表入賀中途邁危疾極力調護後卒為殯殮

歸其櫬居官性狷介不能俯仰要路改知永州府丁內艱歸家居親賢下士詩酒自適兄弟故舊貧乏者必周貸無靳至焚雷蕭各券拜祭師墓卓有古風所著有自新遺稿祀鄉賢牛志

鄭廷鵠字元侍西廂人少警敏從塾師海貞範學

宏博辨麗海奇之妻以女登嘉靖戊子鄉薦戊

戌進士第三授工部主事阮通志調儀制郎尋陞

吏科給事中晉工科左給事會京師地震上便

宜四事一黃花鎮古北口朝河川爲京師後門

宜遣官築關城增水壘一貴州地連三藩權不

統一宜設總督置一控三於法便且省費一京

瓊山縣志

卷十九

人物名賢

二十七

師草場等處督理者率歲遷因以滋弊請限三年一蘇松等郡財賦所滙請設參藩董其責成俱關宗社至計所畫策類爲國家建長利嘉靖庚戌大計吏疏皆手出以公正稱徐中行撰傳是年

分校禮闈一時出門下者皆海內名士張文毅公服其有人倫之鑒牛志擢江西督學副使廉公

有威裁抑僥倖嘗修白鹿洞志增置書院田尋

遷江西參政以母老乞歸築室石湖著書自娛

累薦不起所著有藿膾集瓊志藁易禮春秋說

蘭省掖垣學臺石湖等集若干卷祀鄉賢郭通志

許益光字可大嘉靖戊子舉於鄉孝友天植讓產

於兄捐其妻粧送資賄以嫁兒女計偕逆旅殞
友林儀薦人多其義知湖廣瀏陽縣冰蘖自持

以丈勘民田積勞而卒民哀如喪考妣祀名宦

郝通志祀鄉賢孫暉斗領萬厯壬子鄉薦官至戶

部主事阮通志

李應和字仲節嘉靖戊子鄉薦授臨海教諭陞徽

州教授尋署府篆賑饑條上數事皆掾時良策

擢南監助教以老乞歸所著有讀書抄木齋集

郝通志祀鄉賢

海瑞字汝賢一字國開號剛峯左所人先世隸籍

番禺洪武十六年有答兒者從軍海南著姓瓊

瓊山縣志 卷十九

人物 名賢

二十五

山不數傳族氏蕃衍至寬領鄉薦知閩中縣事

卽其大父寬子廩生瀚卽其父瑞生而秀挺稍

知識直欲學聖賢梁雲龍撰傳四歲而孤母謝氏矢

志訓之自爲諸生時卽抱當世之慮郝通志居室

闕人所易忽瑞獨謂此正君子造端之道位內

位外飭己型家一切男女僕役至老死不踰梱

闕相往來伯仲姻婭肅雍坐立跪拜惟禮其論

文則曰不過如畫師之寫神耳窮一生讀書作

文於國家身心毫無補益何異宋人所謂可惜

一生心用在五字上乎故瑞之用心匪特恥爲

聲詩卽古今文辭惟以闡發性靈而止不稟古

則而自成一家嘉靖丙午督學林某廉其行誼
大加獎賞適出婦某訟瑞且誣裝資林某詰問
以出妻令其可嫁對至所誣裝俱不辯惟貸償
而已林益重之亡酉督學蔡某試題有不曰白
乎之句手瑞卷珍翫移時因詢瑞隱事嘆曰茲
所謂渙而不緇者耶梁撰傳是年舉鄉試所對治
黎策甚詳明年入都復伏闕上平黎疏俱見海
大畧以開十字路置邑屯田建官興學爲務
時以疏下兵部議而事竟寢阮通志癸丑授南平
教諭揭申棖剛者之辨鄉原忠信廉潔之似古
人不見諸侯之守以廣厲學士其參謁上官執

瓊山縣志

卷十九

人物名賢

三十九

憲綱抗師儒禮督學朱衡重之檄掌書院郝通志

御史詣學宮屬吏咸伏謁瑞獨長揖曰臺謁當

以屬吏此堂師長教士地不當屈明史本傳抗顏南

平四年如一日守相臺察咸交稱之擢知淳安

縣事履境睹痛苦萬狀用是申飭所行事宜由

縣而丞而尉而師儒而里老而生員而吏胥著

爲令曰淳安政事其自奉也俸薪外絲毫不侵

撫按出例陰遺其書無則禍至瑞曰充軍死

罪甘受安可爲此穿窬舉動外官入京有交際

謂做官不得不如是瑞曰盡天下而不爲上官

之賂豈盡不遷又盡天下而惟上官之賂豈盡

不黜安可身居下流也

梁雲龍撰傳

布袍脫粟令老

僕藝蔬自給總督胡宗憲嘗語人曰昨聞海令
爲母壽市肉二斤矣宗憲子過淳安怒驛吏倒
懸之瑞曰曩胡公按部令所過無供張今其行
裝威必非胡公子發囊金數千納之庫馳告宗
憲宗憲無以罪嚴嵩黨都御史鄔懋卿經理八
省離政諸縣供張甚盛到淳安瑞抗言邑小不
容車馬供具簡約且按其生事者懋卿志甚然
素聞瑞名爲歛威去時瑞已擢嘉興通判鄔因
囑巡鹽御史袁淳誣以他事謫興國州判久之
陸光祖爲文選擢戶部主事時世宗享國日久

瓊山縣志

卷十九

人物名賢

二十一

不視朝深居西苑專意齋醮督撫大吏爭上符

瑞禮官輒表賀廷臣自楊最楊爵得罪後無敢

言時政者四十五年二月瑞獨抗疏陳十事皆

人所不敢言者

疏見藝文

帝得疏大怒抵之地顧左

右曰趣執之無使遁宦者黃錦在側曰此人素

有癡名聞上疏時自知觸忤當死市一棺訣妻

子待罪於朝僮僕亦奔散無留者是不遁也帝

默然少頃復取再三讀之爲感動太息留中者

數月嘗曰此人可方比干第朕非紂耳會帝有

疾煩懣不樂召閣臣徐階議內禪因曰海瑞言

俱是朕今久病安能視事又曰朕不自謹惜致

此疾困使朕能出御便殿豈受此人詬詈耶遂
逮瑞下詔獄究主使者尋移刑部論死獄上仍
留中戶部司務何以尙疏請釋之帝命錦衣衛
杖詵越二月帝崩穆宗立乃獲釋帝初崩外廷
多未知提罕主事聞狀以瑞且見用設酒饌款
之瑞自疑當赴西市恣飲噉不顧主事因附耳
語曰官車適晏駕先生今卽出大用矣瑞曰信
然乎卽大慟盡嘔出所飲食隕絕於地終夜哭
不絕聲旣釋復故官俄改兵部擢尙寶丞調大
理隆慶元年徐階爲御史齊康所劾瑞言階事
先帝無能赦神仙土木之誤畏威保位誠亦有

瓊山縣志

卷十九

人物名賢

三十一

之然自執政以來憂勤國事休休有容有足多
者康乃甘心鷹犬搏噬善類其罪又浮於高拱
人避其言歷兩京左右通政三年己巳夏以右
僉都御史巡撫應天十府屬吏憚其威墨吏多
自免去有勢家朱丹其門聞瑞至黜之中人監
織造者爲斂輿從明史吳淞江久淤爲陸而常熟
白茅港河道日湮瑞疏濬之身乘小舟督畚鍤
不期月告成民忘其勞並活饑民數十萬賈志素
疾大戶兼井力推豪強撫窮弱貧民田入於富
室者率奪還之下令飈發凌厲所司惴惴奉行
豪有力者至竄他鄉以避由是怨頗與都給事

中舒化論瑞不達政體宜以南京清秩處之帝
猶優詔獎瑞已而給事中戴鳳翔劾瑞沾名亂
政遂改督南京糧儲瑞撫吳甫半歲銳意興草
民賴其利小民聞當去號泣載道家繪像祀之
將履新任會高拱掌吏部素銜瑞并其職於南
京戶部瑞遂謝病歸家居十五年前後薦者不
下十餘疏萬歷初張居正當國亦不樂瑞令巡
按御史廉察之御史至山中視瑞設雞黍相對
食居舍蕭然御史嘆息去居正憚瑞峭直中外
交薦卒不召十二年冬吏部擬用左通政帝雅
重瑞名畀以前職明年正月召爲南京右僉都

瓊山縣志

卷十九

人物名賢

三三

御史改南京吏部右侍郎瑞年已七十二矣疏
言衰老垂死願比古人尸諫之義大畧謂陛下
勵精圖治而治化不臻者貪吏之刑輕也諸臣
莫能言其故反借待士有禮之說交口而文其
非夫待士有禮而民則何罪哉因舉太祖剝皮
囊草及洪武三十年定律枉法八十貫論絞謂
今當用此懲貪其他規切時政語極剴切獨勸
帝嚴刑時議以爲非御史梅鵬祚劾之帝雖以
瑞言爲過然察其誠爲奪鵬祚俸帝屢欲召用
瑞執政陰阻之乃以爲南京右都御史諸司素
媮惰瑞以身矯之有御史偶陳戲樂欲遵太祖

法予之杖百司惴恐多患苦之

明議章有司諸史

冗役冗費極言軍民利病時御史房寰督學南

畿物議沸騰恐瑞糾擿欲先發

牛志給事中鍾宇

淳復愆愆寰再上疏詆瑞

明史觀政進士諸壽賢

顧允成彭遵古抗疏畧言寰妬賢醜正不復知

人間羞恥事臣等自幼讀書卽知慕瑞以爲當

代偉人寰大肆貪污聞瑞之風宜愧且死反敢

造言逞誣臣等所爲痛心因劾其欺罔七罪始

寰疏出朝野多切齒而政府庇之但擬旨譙讓

明史顧允成傳瑞亦屢疏乞休慰留不允十五年丁亥

冬卒於留都

阮通志

年七十三瑞無子卒時僉都

瓊山縣志

卷十九

人物名賢

三十三

御史王用汲入視葛幃傲籬有寒士所不堪者

因泣下醵金爲歛小民罷市喪出江上白衣冠

送者夾岸酹而哭者百里不絕贈太子太保賜

祭葬諡忠介瑞爲學以剛爲主因自號剛峯天

下稱剛峯先生嘗言欲天下治安必行井田之

法必不得已而限田又不得已而均稅尙可存

古人遺意故自爲知縣以至巡撫所至力行清

丈頒一條鞭法意主於利民

明史海瑞秉剛勁之

性慤直自遂蓋可希風漢汲黯宋包拯苦節自

厲誠爲人所難能

明史傳贊雖官歷六卿編茅自處

環堵蕭然俸祿所入自給外悉以周族屬之貧

者然子姓稍有不戢必鳴之官未嘗假借尙書
姜寶謂瑞天下奇男子志節兼狂狷云所著有
備忘集淳安政事稿行世郝通志平日雖不以文
名而所作勁氣直達侃侃而談有凜然不可犯
之概當嘉隆間士氣頹茶之際切墨引繩振頑
醒贖誠亦救時之藥石也滌穢解結非大黃芒
硝不能取效未可以其峻厲疑也欽定四庫全書備忘

集提 祀鄉賢

蔣蒙字養正阮通志作字山泉左所人與海瑞相友善嘉

靖間由歲貢任靈山訓導陞建寧教諭兩任俸

餘俱買田以給貧生署靈山縣事寇臨城率兵

瓊山縣志 卷十九

人物名賢 三四

捍禦境賴保全靈人建生祠牛志任建陽教諭性

節儉食僅脫粟衣做不堪所入俸錢悉以周貧

乏給喪葬卒於官篋無餘貲喪不能歸聞者悼

之阮通志

陳思誠字伯孚少遊郡庠性孝友恂恂雅飭嘗師

湛甘泉講明正學諭宣城知安義兢兢能業其

官解綬家居儼然儒林風度當道陳雅造廬禮

之鄉人有遺金請托者亟麾之曰鬼神共鑒意

念難欺賈志

楊應辰字德良禎之姪中所人由貢授梧州訓導

陞柳城教諭居官清慎致仕家居孝友事病姑

如母撫遺姪猶子養寡嫂終身且厚塋之有司
屢舉大賓不就卒海忠介銘其墓牛志

劉裁正字伯博茂人領嘉靖戊午鄉薦天性孝
友居家貲財不私與人交常推心置腹未仕而

卒賈志祀鄉賢

王汝為字子宣大攝人賦性剛方學稱博洽嘉靖

辛酉鄉薦為貴縣教諭有蘇湖風丙子充貴州

鄉試同考官陞鄱陽縣令勵精為治勤恤民隱

竟以正直難容乞歸囊橐如洗性尤友愛厚事

兄嫂捐貲贖弟於難里巷稱之詩文力追古雅

有尋懷集存塾稿撫弦餘韻郝通志祀鄉賢

瓊山縣志卷十九

人物名賢 三五

王時元字遇春逸士用之子樸茂謙恭篤志力學

嘉靖甲子鄉薦知楚之東安縣察覈鹽艘剔除

陋例遷判常德水蕪益厲冤獄久不決者立洗

之歲饑賑粥存活數千人丁母憂歸不受一錢

歲餘卒所著有四禮集童訓郝通志祀鄉賢

陳大有興義人家貧篤學古樸端方由歲貢領嘉

靖甲子鄉薦令常山草去陋規涖民有善政至

今常山人稱之郝通志有生祠祭田同聲錄祀名

宦祀鄉賢牛志

梁雲龍字會可梁陳人家貧篤學領嘉靖甲子鄉

薦萬歷癸未進士授兵部武庫司主事戊子典

試貴州所取多名士兵部尙書鄭洛經畧臨洮
雲龍贊畫建言絕甘涼假道以扼川海之吭果
奏奇捷晉副使治兵井陘旋調天津天津故京
師咽喉倭侵朝鮮勢甚猖獗有增設邊防之議
雲龍持議以爲宜勅將帥固守罷敵臺陷阱諸
費所省數十萬進參政治兵開原巨寇繫頸受
成功著紀錄調隴右分守備兵莊浪會土營魯
氏橫恣不法奪其營務遂中蜚語以參政聽調
遵例候代尙從大司馬經畧兩河松山之役恢
復允吾一帶故地七百餘里無何解任抵家以
叙前後邊功復原任進荆南布政使以征苗功

瓊山縣志

卷十九

人物名賢

二十六

荷褒獎晉一品俸

郝通志

楚藩變起就陞湖廣巡

撫擘畫楚事親藩慙蕙盞蕙等五人有罪擬置
大辟時論難之上從其議

牛志

遂竟於獄丙午卒

於官贈兵部左侍郎賜祭葬祀鄉賢

阮通志

子思

秦下別有傳

郝通志

陳傅嘉蒼原人孝友樂施以歲貢赴京殯亡友於
途而資其僕歸司訓詔安捐俸助貧生時倭寇
犯城令僕善弓矢者射殺數賊寇退詔安令欲
上其功力止之未幾告休祀詔安縣名宦後祀

鄉賢

蕭志

陳大烈字允成博茂人隆慶丁卯鄉薦授處州司

訓署慶元龍泉二縣一塵不染丁艱起復補訓
泉州擢武義令民生祠陞烏撒同知恬退歸
休居家睦於邦族一味清修祀鄉賢牛志

王天麟字文瑞左所人領隆慶庚午鄉薦知贛縣
入覲途遇李氏女鬻於陳啼號欲赴水死慨然
以五十金贖還其母丁外艱歸卒於家阮通志祀

鄉賢

牛大緯字章甫號閣齋前所人萬歷己卯鄉薦令
連城民苦浮糧爲累歲輸千餘金大緯力請得
蠲其半捐俸賑荒民賴全活去日治裝惟圖書
數卷而已民立祠祀之陞邛州知州阮通志

瓊山縣志

卷十九

人物名賢

三十七

許子偉字用一孤貧力學登萬歷壬午鄉薦丙戌
進士授行人尋擢兵科給事中轉吏科右給抗
顏諫諍直聲大著創瓊州會館於京師鄉紳羈
旅稱便告病歸籍假滿補戶科右給事中以彈
劾權貴忤旨謫銅仁府經歷遂歸養母凡戚里
貧乏多所賑給值黎寇猖獗貽書當事請勦之
內使開採珠船科派瓊珠役以萬斛子偉力言
得減其數置義學於儋耳開敦仁書院於郡中
建明昌塔以培文風中外疏薦起用未報卒賜
謚忠直建坊著有諫垣錄廣易通敦仁編鄉人
請祀於明昌塔以配邱海今祀鄉賢郝通志

陳應龍字時見東廂人天性孝友父嘗犯罪應龍哀鳴願以身代當事憐釋之家貧舌耕門生楊瑾自海北來受業病死捐棺爲之殯領萬歷壬午鄉薦判嘉興督理織造一洗舊例以不逢時

罷歸

柳通志

祀鄉賢

何其義字乃仕梁老人少英穎萬歷甲午鄉薦辛丑進士知政和縣剔蠹釐奸捐俸募建學宮以異等調繁上杭冰蘖自矢杭人尸祝之內艱起復擢戶部主事司太倉草一切浮羨陋規與許子偉捐貲創瓊南會館以便瓊之赴京者王子督儲通州卒於署

阮通志

祀鄉賢

瓊山縣志

卷十九

人物名賢

三十八

潘之楫號寰瀛西廂二人天性篤孝生甫週歲母陳孀居撫之長出就傅母每留餘食啖之之楫見笑無烟知母未食忍殮半以奉母母燈下紡織之楫取師所授書就餘光而讀才名甚著登萬歷甲午賢書戊戌上公車向母泣曰楫以母苦節未揚親恩未報故爲此萬里之行不則安忍離膝下乎是歲會試乙榜歷任善化縣著賢聲赴闕陳情賜建坊以表母節焉祀鄉賢

牛志

黃壽之下東岸人宏宇子由萬歷丁酉舉人知漸江景寧縣爲海忠介壻清廉節愛綽有婦翁之風時民散田荒官民交困申請丈量合邑安堵

陞處州府同知後致仕歸

阮通志

陳邦禎

蕭志作正

字德興博茂人少失怙恃依戚黨以

成立苦志篤學有鄰女挑之峻詞固拒不減魯

男子風以歲薦訓高涼郡守李序嘉其行誼督

學支簡亭羨其藝文譽滿士林官六載囊橐蕭

然牛志祀鄉賢

謝應華歲貢生下東岸人事親甚孝有弟被掠傾

產贖之司訓天台旋諭詔安教授南雄皆有蘇

湖遺範食貧訓子子龍文發名成業鄉里稱之

郝通志

祀鄉賢龍文字喬東萬歷戊午鄉薦崇禎

戊辰進士知豐城縣廉潔自持百廢俱舉有政

瓊山縣志

卷十九

人物名賢

三十九

聲阮通志

張希堯號元溪東廂人萬歷癸卯亞魁讀書明道

賦性端嚴恒以修己治人爲務謁選值同籍爲

郎語之曰此來可得美官應曰有命存焉絕無

纖芥營謀任廣西羅城知縣宦囊蕭然樂育所

就率多名彥迨優遊初服遠近負笈執經者踵

相接也所居堂曰四齋謂松有花而齋香竹有

葉而齋花梅有香而齋葉渠以一齋老於三齋

之間云狷潔天成言笑不苟仲子洪字允湛領

天啟辛酉鄉薦嘗親朋宴集座侍青樓歸輒厲

色訶戒曰若婢子我輩安可並席又或家僕博

奕相戲堯督洪令跪責以禮法不謹詎能型家
其古道多類此迄今兒童走卒皆知元溪先生

焉牛志

邱爾懿號秉初西廂人登萬歷己酉賢書卽丙午

鄉薦爾毅胞弟係文莊七代孫任江西贛縣知

縣居官廉介吏畏民懷兄弟允稱二難惇睦燕

貽公庭罕跡牛志

蔡廷椿字一卿遵都人仕儲子七歲失怙哀毀骨

立由陵水歲貢任霍邱丞歸橐蕭然居鄉課子

弟捐田四十畝供膏火鄉族有不善者惟恐其

知之子希皋狷慤好修士論賢之孫光前歲貢

瓊山縣志 卷十九

人物名賢 罕

生能繼祖父志蕭志

吳鉉鍾號惺一那邕人萬歷戊午科舉人博學宏

才筮仕湖廣均州知州視民如子值流寇攻州

捍禦半年檄召援兵危疆賴靖比歸家無餘積

恬如也牛志

梁思泰梁陳人雲龍子由恩廕入太學登天啟順

天副榜判湖廣荊州陞貴陽府同知奉差督

征黔寇義激捐軀崇禎十四年承

烈賜祭建坊立祠祀鄉賢廕子牛志

牛志

張紹美官隆人父號事軒以戴禮冠東粵因授禮

焉童誦輒通大意十七補郡弟子員藉藉有聲
居家孝友食餼郡庠屆貢前一月而卒時論傷
之具詞追稱遺行郡守黃公督學商公考錄實
蹟特賜孝行崇祀鄉賢牛志

國朝

張履吉字旋九東廂人明孝子可載裔孫自幼篤
學以歲薦終其身士論惜之胸無城府足不履
長吏庭教授南湖一遵朱子學的及門多髦士
康熙四十五年郡伯賈公聘修郡志極見推重
授靈山司訓卒年八十四所著有南湖稿藏於

家參蕭志

瓊山縣志

卷十九

人物名賢

四

馮侯字次公號潛亭興義人拔貢博學篤行高尚
其志隱南湖陶山間士大夫咸推重之誨訓生
徒門多名宿嘗遊萬州著有東山備史湖山合
稿鹿溪草竹泚吟等集邑令茹鉉旌匾曰文節

耆英通志

林儲英字子千大林人自少英異家貧苦學博涉
經史康熙己卯鄉薦沉酣於古文詞翰之間生
平規行矩步嘖笑不苟非公事不至公庭爲多
士楷模當道延掌書院五年名雋多出其門授
蒙陰令署沂州政蹟卓然民德之勒諸石作宰
四年清風兩袖卒年七十有七至今人猶慕其

風云參蕭志

蕭元長字乾初石山人歲貢斯美子幼聰明能文
由歲貢領康熙乙酉鄉薦生平敦倫力學文行
兼茂教授生徒多所成就有四勿居同門錄買
公棠聘修郡志纂輯簡明所著有選註綱鑑便
讀藏於家為學必擇其要多類此卒年五十六

參蕭志

吳金字聲九由歲貢領乾隆癸酉鄉薦品端行粹
博覽經史教授生徒遵白鹿洞學規瓊郡知名
士咸出其門所著有敬齋集蕭志

吳典字國猷號學齋西廂人父位和見孝友傳典

瓊山縣志

卷十九

人物名賢

三十一

幼穎異嗜學讀書目數行下年十五應童子試
輒冠其曹遂入泮乾隆乙酉受知於翁覃溪學
使選拔貢是年舉於鄉己丑成進士改庶吉士
授編修嘗總校中秘書與修

國史及三通館永樂大典 四庫全書書成蒙

賜內宴並賚龍尾硯白玉如意文綺諸品丁酉庚子兩

充順天鄉試同考官甲辰分校禮闈所得皆知
名士在京與同僚相切磋以學行為當道所推

都中邀眾醜金劄建瓊州館於靈中坊大外郎

營為瓊人士棲息之所典自為記見藝文丁外艱

歸遂不起主講瓊臺書院獎進後學重修府學

宮換以石柱豎造文明樓建郡南太史橋及白沙東西等橋力襄義舉疊疊不倦年五十卒弟班字昆侯號惺齋中乾隆庚子鄉試爲人平直坦易篤於友于以弟玠夜寢苦怯與共枕被者十餘年歷署電白信宜司訓轉授翁源教諭與諸生切摩得衆士心

參張志

瓊山縣志卷之十九終

人物

名賢

四三

瓊山縣志卷十九